



Nunatsinni ingerlatseqatigiiffiit tamakkiisumik ilaannakuusumilluunniit Namminersorlutik Oqatussanit pigineqartut naalakkersuinikkut qanoq ineriartortinnissaannut kissaatigisavut, tassungalu ilanngullugu sinneqartooruteqartarnissaannik, iluanaarutinik kiffartuussinikkullu inissisimanissaannik sutigut piumasaqaateqassanersugut pillugit apeqquteqaat aallaavigalugu oqallinnissamut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Nunatta oqaluttuarisaanerani ikaarsaariarfiit assigiinngitsut ingerlavigineqarsimaneranni, nunarujussuarmi inuiaat ikittunnguit inuuffigisariaqarfianni aqqissuuseriaatsit assigiinngitsut ingerlanneqartarsimapput ilaatsigut nammaqatigiittoqartariaqavinneranik inuiaqatigiinniillu pisariaqartinneqarnerannik patsiseqartumik, ingerlatseqatigiiffiit ilaat pisortaniit aallartinneqarlutillu pigineqartariaqartarsimapput.

Inuussutissarsiorfigissallugu periarfissaqarfiusuni nunatta siammasissumik inuuffiunissaa illersugarigatsigu, ingerlatseqatigiiffiit tamatumunnga qularnaarinnissutaasut innarlarsimaarneqannginnissaat pingaartipparput.

Taama periaaseqarluni nunap qanoq najugaqarfigineqarnissaannik aqutissiuigaanni aamma pisussaaffiuvoq naalakkersuinikkut qularnaarinnissalluni tamatuma illersorneqartumik ingerlannissaannut. Arlaltsigut nunatsinni inuit tamarmik peqataaffigisaannik nammaqatigiinnissamik pisariaqartitsisoqarpoq maannamut suli attanneqartariaqartunik.

Ingerlatseqatigiiffiit inuiaqatigiinniit isumalluutigineqartut nunatsinnilu siammasissumik sullissisuunissamik pisussaaffeqartut, piginnittuminnit artukkarsimaartinneqartariaqanngillat sullissilluarsinnaannerunissaraluannut akornusiisumik. Pisortat namminneq ingerlatseqatigiiffiutiminniit ukiumoortumik aningaasanik iluanaarutinik imminnut nuutsivigisarnerat arlariinnit paaseqatigiiffiusumik annertussusilerneqartarnissaa pisariaqarpoq. Ingerlatseqatigiiffiit pigisaminnik ataavartumik nutarterinissaminnut aningaasartuutigisassaatt innarlitsaalineqartariaqartutut isumaqarfigaarput.

Pisortat ingerlatseqatigiiffiutaat inuiaqatigiinnut sullissisussatut pilersinneqartarput, pisortanit iluanaarniarfiusussaannatik. Aningaasartuutit matoreerneranni sinneqartoorutaasussat taamaallaat tassaasussaapput, kiffartuussinerminnut sullissilluarsinnaanerulernissaminnut atortunut nutarterinernut assigisaannullu atugassaat. Tamakku aallaavigalugit sullissinermi akigitinneqartut nalimmassarneqartassammata. Ullumikkut suni tamani kiffartuussiffiusuni akigitinneqartut qaffasippallaarneranni, pisortat piginnittutut pissarsiarisartagaannut taarsiullugu atuisut oqilisaavigineqarsinnaaneratt nalilersorneqartariaqarsoraarput. Pisortanummi aningaasarsiorfissatut ingerlatseqatigiiffiit pilersinneqarnikuunngimmata, akerlianik kiffartuussilluarnissamik siunertaqarfiullutik pilersitaallutik.

Pisortanit aningaasat isertinngitsoorneqartalersussat nalingi, nalinginnaasumik isaatitsiffiusussatut naatsorsuussat aqutigalugit isertinneqartalernissaat pisassaguni tulluarnepaajussaaq.

INUIT ATAQATIGIIT

INATSISARTUNI



Upernaaq Inatsisartut ataatsimiinnitsinni aalajangikkatsinnut ilaavoq, Tele Greenland-ip mobil-itigut sullissineri namminersortunngorsarneqassanngitsut, ingerlaasitoqarlu malillugu kisermaassisussaataanerup aqqani tamanna ingerlanneqaannassasoq. Nunarujussuarmi siammasilluta inuuffigisatsinnik nunaqaratta periaatsit taama ittut atortarnissaat allaqqunneqarsinnaasussaangilaq. Isaatitsiffiulluartut aalajangersimasut, piginnittup ataatsip nunatsinnut siammasissumut sullissivissamisut akisussaaffigisaminut iluaqutaasussanngorlugit atussagai pisussaaffilerneqarpoq. Isumaqarpugut pisortat oqarasuaateqarnikkut kiffartuussivimmik oqartussaanerisa piginnittuunerullu siunertaat pitsaasoq matumani ator neqartoq.

Ingerlatseqatigiiffiit nunatsinni siammasissumik sullissisussaataasut, qularnaatsumik sinneqartoorfiusartunik ingerlataqaatigalutik kiffartuussisussaataasarnissaat pissusissamisoorsoraarput. Sinneqartoorfiusummi tamaasa namminersortunngorsarneqaraluarpata, amigartoorfiusumik ingerlatsiffiusut qanoq qajannartigisumik toqqammaveqassasut nalunngilagut, amigartoorfiusumik ingerlasut tamaasa assigalugit apeqqusersorneqartualissammata.

Ingerlatiseqatigiiffiit pisortanit pigineqartut, nunatsinni soqutigisatsinnik sullissisussaataagamik pigineqatigiissutit amerlanersaat nunatsinni pisortanit pigineqartariaqartut, Inuit Ataqatigiinni isumaqarpugut.

Royal Arctic Line-p pissusitoqanngorsimasunik qimatsiniarluni nutaamik periaaseqarluni nunatsinnut nunatsinniillu assartuisarnermik aallartitsinialeruna nuannaaqaluta tusarluarparput. Aamma sulisoqarnermi tungaatigut ersarissumik anguniagaqarlutik siunnerfiliisimanerat assut soqutiginaateqartutut isigaarput. Isumalluarfigaarput allannguerujussuarniarneq kiffartuusilerumaarnermik pitsaasumik kinguneqarumaartoq.

Taama annikitsumik itisiliiffigerujussuarnagit ingerlatseqatigiiffiit pisortanit pigineqartut isummorsorfigaavut, neriulluta oqallinneq manna suleriaqqinnissanut sakkussarsiffiulluassasoq.